

# Promover champs da sport e vacanzas per giuvenils

La regenza è pronta d'acceptar in'incumbensa parlamentara dal deputà verd-liberal Jürg Kappeler

DA MARTIN CABALZAR

■ **Sco quai che il deputà verd-liberal Jürg Kappeler (Cuira) constatescha renunzian adina dapli scolazions ed organisaziuns da giuvenils d'organisar champs da sport e da vacanzas. Cun ina incumbensa parlamentara sustegnida da 56 collegas vul Kappeler incumbensar la regenza da far frunt a quest trend cun elavurar e realisar in concept adattà. E Jürg Kappeler ha gia imaginaziuns concretas co quai pudes succeder, numnadamain tras la promozion activa dal Grischun sco lieu per champs da sport e vacanzas e tras champs organisads tant per la stagiun da stad sco per la stagiun d'enviern. Sco partenarias giavischadas vesa Kappeler tant scolazions ed organisaziuns da giuventetgna grischunas sco er extrachantunales. Plinavant duai vegnir mess a disposiziun il material da sport e giu sco era las personas cun las scolaziuns necessarias per direger tals champs.**

Jürg Kappeler accentuescha ch'il turissem haja in'impurtanza speziala per il chantun Grischun. Ils purschiders da prestaziuns turisticas sajan dependents dal fatg ch'il Grischun vegnia visità regularmain d'in grond dumber da giasts. In factur impurtant per decider da returnar adina puspè en il Grischun per far vacanzas sajan las emozions, di Kappeler. Eveniments nunemblidaiels ch'ins haja fatg sco uffant u sco giuvenil hajan in effect spezialmain ferm sin la tscherna da la destinaziun da vacanzas da pli tard.

## La regenza sustegna l'idea

Era la regenza è da l'avis che champs da sport e da vacanzas contribueschian ad experientschas emozionalas restantas e sajan impurtants per il moviment e per il svilup fisic, psichic e social dals giuvenils. Era sin plaun federal sajan ins da-



I dat adina pli paucs champs da skis e da sport en il Grischun. Deputà Jürg Kappeler vul procurar per remedura.

MAD

ventà cunscent da l'impurtanza da tals champs cunzunt en connex cun la scola ed haja perquai facilità cun mesiras adattadas l'organisaziun dals champs da giuventetgna + sport. Quellas finamiras e mesiras sajan perquai era vegnidas fixadas en la nova lescha federala per la promozion dal sport e da l'activitad fisica. Uschia saja da nov era pussaivel da far champs cun uffants er durant il temp da scola e d'indemnisar quels cumplainmain. Sur Giuventetgna + sport possia era vegnir emprestà fitg favuraivlamain material, en spezial per champs da sport

alpin, da sport d'aua e da sport da naiv. Sulet ils custs da spediziun stoppian vegnir surpigliads dals organisaturs. Per motivs finansials na paria dentant betg d'esser raschunavel da tegnair a disposiziun tal material sin plaun federal e chantunal.

## Agens champs da sport per giuvenils

Gia dapi biers onns organischescha la partiziun «sport» da l'uffizi per la scola populara e dal sport agens champs da sport. Quests uschenunads «champs da sport per giuvenils» vegnan purschids en col-

lavoraziun cun ils chantuns da la Svizra orientala e dal Principadi da Liechtenstein a tut ils giuvenils da la Svizra orientala. En questa cumbinaziun stat a disposiziun ina gronda paletta da disciplinas da sport cun var 70 champs, repartids sur tut l'onn e che vegnan frequentads bain dals giuvenils. En quest rom metta il chantun Grischun a disposiziun 4 champs cun circa 300 plazs. Biers champs d'enviern dals auters chantuns da la Svizra orientala han er lieu en il Grischun en il rom da quest program, scriva la regenza.

## Project «Uffants gai en muntogna»

Gia cun l'incumbensa da deputà Maurus Tomaschett (pcd Cadi) ch'era vegnida inoltrada l'october 2012 è la regenza vegnida incaricada da promover pli fitg emnas da sport da naiv en scolina. Per quest intent ed en il rom dal project «Uffants gai en muntogna» saja vegnida fatta ina retschertga tar tut las direcziuns da scola en il chantun Grischun. Quella ha mussà che passa la mesadad da las scolas fa durant il temp da scola in champ da naiv sin almain in stgalim. In quart da las scolazions senza champs da sport da naiv fa auters champs da sport. Ensemen cun las retschertgas èn las direcziuns da las scolazions vegnidas rendidas attentas e sensibilizadas per las pussaivladads extendidas da profitar da Giuventetgna + sport. La partiziun da sport da l'uffizi da scola populara e sport mainia uss a basa da las respostas discurs cun las scolazions che han demussà interess per activitads supplementaras da sport e da moviment en furma da champs u da curs.

## Vasta purschida en tut las regions

Sco la regenza scriva preveda il sboz per la nova lescha chantunala per la promozion dal sport il sustegn per ina vasta purschida da disciplinas da port e d'activitads da moviment. Quellas purschidas duain vegnir offeridas en tut las regions e las activitads duain vegnir promovidas e coordinadas cun programs e cun projects adattads. Sco mesira en quest connex vegnia la regenza er obligada da relaschar in concept cumplexsiv per promover il sport ed il moviment en il Grischun ed era da controllar quel periodicamain. En quel connex vegnia era la promozion da champs da skis e temp liber ad esser in tema. D'in concept separà duai però vegnir desisti, manaja la regenza.

L'incumbensa vegn tractada l'emna proxima en il cussegl grond.